



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

**Odluka**  
**o standardima i kriterijima za imenovanje pravobranioca i zamjenika pravobranioca**  
**Pravobranilaštva Grada Sarajeva**  
**(Prijedlog)**

**Predlagač:** Gradonačelnica  
**Obradivač:** Stručna služba za poslove  
kabineta i poslove Gradske uprave

**Sarajevo, juli 2022. godine**

---

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 216 659  
**Fax:** +387 33 205 874  
**Email:** [gsgv@sarajevo.ba](mailto:gsgv@sarajevo.ba)  
**Web:** [gradskovijece.sarajevo.ba](http://gradskovijece.sarajevo.ba)



Na osnovu člana 6. i 7. Zakona o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, br. 12/03, 34/03 i 65/13), člana 45. i člana 46. Zakona o pravobranilaštvu („Službene novine Kantona Sarajevo“, broj 33/08 – Novi prečišćeni tekst, 7/12 i 44/16), člana 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), te člana 16. i člana 17. Odluke o osnivanju Pravobranilaštva Grada Sarajeva („Službene novine Kantona Sarajevo“, br. 20/10, 30/15, 12/17 i 41/21), Gradsko vijeće Grada Sarajeva, na \_\_. sjednici održanoj dana \_\_. \_\_. 2022. godine, donijelo je

(Prijedlog)

**Odluku  
o standardima i kriterijima za imenovanje pravobranioca i zamjenika pravobranioca  
Pravobranilaštva Grada Sarajeva**

**Član 1.**

(Predmet)

Ovom odlukom utvrđuju se standardi i kriteriji za imenovanje pravobranioca i zamjenika pravobranioca Pravobranilaštva Grada Sarajeva.

**Član 2.**

(Gramatička terminologija)

Odredbe ove odluke odnose se podjednako na lica muškog i ženskog spola, bez obzira na rod imenice upotrijebljen u tekstu Odluke.

**Član 3.**

(Opći uslovi)

Kandidati za pravobranioca i zamjenika pravobranioca moraju ispunjavati sljedeće opće uslove:

- a) da su državljani Bosne i Hercegovine;
- b) da su stariji od 18 godina;
- c) da nisu otpušteni iz državne službe kao rezultat disciplinske mjere na bilo kojem nivou vlasti u BiH u periodu od tri godine prije dana objave upražnjene pozicije;
- d) da se na njih ne odnosi član IX 1. Ustava Bosne i Hercegovine;
- e) da nisu na funkciji u političkoj stranci.

**Član 4.**

(Posebni uslovi)

Pored navedenih općih uslova, kandidati za pravobranioca i zamjenika pravobranioca Pravobranilaštva Grada Sarajeva moraju da ispunjavaju i sljedeće posebne uslove:

- a) da je diplomirani pravnik ili Bakalaureat/Bechelor prava sa ostvarenih 240 ECTS studijskih bodova Bolonjskog sistema studiranja;
- b) da ima položen pravosudni ispit;
- c) da ima iskustvo u radu na imovinsko-pravnim poslovima u pravobranilaštvu ili pravosudnim organima ili drugim državnim organima ili preduzećima ili drugim pravnim licima u trajanju od najmanje tri godine, nakon položenog pravosudnog ispita;
- d) da posjeduje najviše moralne osobine za obavljanje službe pravobranilaštva.

**Član 5.**

(Poželjni uslovi)

- (1) Prilikom utvrđivanja rang-liste najboljih kandidata, prednost će imati kandidati koji:
  - a) imaju položen specijalistički ispit (sudijski ili advokatski ili notarski ispit);

- b) imaju dugogodišnje iskustvo u radu na imovinsko-pravnim poslovima u pravobranilaštvu ili pravosudnim organima ili drugim državnim organima ili preduzećima ili drugim pravnim licima;
  - c) su dobitnici najviših priznanja i nagrada visokoškolskih ustanova akreditovanih u Bosni i Hercegovini.
- (2) Kandidati koji dokumentovano dokažu postojanje uslova iz stava (1) tačke a), b) i c) ovog člana Odluke, prilikom sačinjavanja rang-liste najboljih kandidata (lista uspješnih kandidata), bodovat će se na sljedeći način:
- a) položen specijalistički ispit (sudijski ili advokatski ili notarski), bez obzira koji od navedenih ili svi navedeni – 10 (deset) bodova;
  - b) dugogodišnje iskustvo u radu na imovinsko-pravnim poslovima u pravobranilaštvu ili pravosudnim organima ili drugim državnim organima ili preduzećima ili drugim pravnim licima, i to:
    - a) od 3 do 5 godina – 1 (jedan) bod;
    - b) od 5 do 10 godina – 3 (tri) boda;
    - c) od 10 do 15 godina – 5 (pet) bodova;
    - d) od 15 do 20 godina i više – 7 (sedam) bodova
  - c) najviše priznanje i nagrada visokoškolske ustanove akreditovane u Bosni i Hercegovini
    - 5 (pet) bodova;
    - ostala priznanja i nagrade visokoškolske ustanove akreditovane u Bosni i Hercegovini – 3 (tri) boda.

#### **Član 6.**

(Javni oglas)

- (1) Javni oglas za upražnjenu poziciju pravobranioca i/ili zamjenika pravobranioca Pravobranilaštva Grada Sarajeva u skladu sa kriterijima ove odluke objavljuje gradonačelnica Grada Sarajeva.
- (2) Oglas iz stava (1) ovog člana objavljuje se u „Službenim novinama Federacije BiH“ i najmanje jednom dnevnom listu velikog tiraža s ciljem da bude dostupan najširoj javnosti.
- (3) Javni oglas za upražnjenu poziciju pravobranioca i/ili zamjenika pravobranioca Pravobranilaštva Grada Sarajeva treba da sadrži:
  - a) opis upražnjene pozicije;
  - b) opće uslove koje treba da ispunjavaju kandidati;
  - c) posebne uslove koje treba da ispunjavaju kandidati;
  - d) poželjne uslove koje treba da ispunjavaju kandidati;
  - e) spisak potrebne dokumentacije;
  - f) način, mjesto i rok podnošenja prijava.
- (4) Javni oglas o upražnjenoj poziciji treba biti dovoljno detaljan kako bi kandidatima dao cjelovitu informaciju o ulozi koju treba obavljati, uslovima službe i dužini trajanja imenovanja, te mogućnosti ponovnog imenovanja.
- (5) U oglasu o upražnjenoj poziciji mora se jasno naglasiti da oni podnosioci prijava sa kojima se ne stupi u kontakt u određenom roku, a nakon roka za podnošenje prijava, neće biti uzeti u razmatranje u daljnjem procesu imenovanja te da se neće dostavljati pisane odbijenice kandidatima koji ne ispunjavaju uslove.

#### **Član 7.**

(Komisija)

- (1) Gradonačelnica Grada Sarajeva svojim rješenjem imenuje Komisiju za izbor na poziciju pravobranioca i/ili zamjenika pravobranioca iz reda državnih službenika.
- (2) Komisija iz stava (1) ovog člana se sastoji od pet članova i prilikom imenovanja članova komisije gradonačelnica Grada Sarajeva će voditi računa o tome da članovi komisije budu

lica koja poznaju odredbe Zakona o ministarskim, vladinim i drugim imenovanjima i koja posjeduju stručno znanje u oblastima za koju se vrši imenovanje.

### **Član 8.**

(Rad komisije)

- (1) Komisija za izbor na poziciju pravobranioca i/ili zamjenika pravobranioca pregledat će sve prijave koje stignu u propisanom roku.
- (2) Na osnovu ove odluke i principa iz člana 3. Zakona o ministarskim, vladinim i drugim imenovanjima, Komisija će sastaviti listu s užim izborom najboljih kandidata koji ispunjavaju kriterije za imenovanje i sve ih pozvati na intervju.
- (3) Nijedan kandidat neće biti stavljen na listu s užim izborom ukoliko mu je prijava neblagovremena ili nepotpuna ili nije povoljno ocjenjen prema kriterijima iz ove odluke.
- (4) Prilikom pozivanja kandidata na intervju, svaki kandidat mora ispuniti obrazac u kojem će iznijeti bilo koje pitanje ili mogućnost koja bi mogla dovesti do sukoba interesa u slučaju da dođe do njegovog imenovanja.
- (5) Komisija za izbor će prije intervjua zahtijevati da kandidati koji su ušli u uži izbor daju podatke o odgovarajućem broju ranijih neposrednih rukovodilaca od kojih mogu dobiti preporuke i informacije o kandidatima.
- (6) Tokom intervjua, koji ne može trajati duže od 15 minuta, komisija za izbor će osigurati sljedeće:
  - a) Da su svi kandidati u potpunosti upoznati sa standardom osobnog integriteta koji se traže za osobe imenovane na javnu poziciju;
  - b) Da su pitanja o sukobu interesa objašnjena i razmotrena detaljno svim kandidatima;
  - c) Da su svi kandidati u potpunosti informisani o pravu javnosti i da mogu uložiti prigovor protiv imenovanja koje se razmatra.
- 7) O toku provođenja intervjua vodi se zapisnik i popunjava obrazac sa utvrđenim kriterijima za ocjenjivanje i vrednovanje kandidata, a koji je sastavni dio ove odluke.
- 8) Sve odluke, uključujući i one koje sadrže odbijenice, moraju u potpunosti biti dokumentovane i moraju se čuvati u Gradskoj upravi.

### **Član 9.**

(Rang-lista najuspješnijih kandidata)

- (1) Nakon intervjua, provedenog ocjenjivanja i na osnovu u potpunosti dokumentovanih odluka svakog člana komisije sačinjenih uz poštivanje odredbi Zakona i ove odluke, Komisija za izbor će putem pisane preporuke predložiti rang-listu sa najboljim kandidatima (listu uspješnih kandidata) gradonačelnici Grada Sarajeva na daljnje razmatranje.
- (2) Pisana preporuka iz stava (1) ovog člana Odluke sadrži sve relevantne informacije koje komisija ima o kandidatima i njene preporuke.
- (3) Smatra se da je kandidat koji je prvi na rang-listi i kojeg je preporučila većina članova komisije najuspješnije prošao otvorenu konkurenciju.

### **Član 10.**

(Odluka o konačnom imenovanju)

- (1) Prijedlog kandidata za imenovanje na poziciju pravobranioca i/ili zamjenika pravobranioca Pravobranilaštva Grada Sarajeva, gradonačelnica Grada Sarajeva dostavlja Gradskom vijeću na razmatranje i odlučivanje.
- (2) Gradsko vijeće, nakon razmatranja prijedloga imenovanja, donosi odluku o konačnom imenovanju.

**Član 11.**

(Objavljivanje)

Konačno imenovanje pravobranioca i/ili zamjenika pravobranioca Pravobranilaštva Grada Sarajeva od strane Gradskog vijeća, objavljuje se u „Službenim novinama Kantona Sarajevo“.

**Član 12.**

(Prigovor)

- (1) Na konačno imenovanje pravobranioca i/ili zamjenika pravobranioca Pravobranilaštva Grada Sarajeva kandidat kao zainteresovana stranka ima pravo podnošenja prigovora na konačno imenovanje.
- (2) Prigovor se podnosi Gradskom vijeću Grada Sarajeva, a kopija se dostavlja Ombudsmenu za ljudska prava Bosne i Hercegovine.
- (3) Pisani odgovor na prigovor dostavlja se u roku od 14 dana od dana kada je prigovor podnesen Ombudsmenu za ljudska prava Bosne i Hercegovine.

**Član 13.**

(Stupanje na snagu)

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

**PREDSJEDAVAJUĆI GRADSKOG VIJEĆA**

**Jasmin Ademović**

Broj:  
Sarajevo,

## OBRAZAC ZA OCJENU KANDIDATA

<i>Ime i prezime:</i>	Radno mjesto:
<i>Organ/Institucija:</i>	Datum:

### 1) OCJENA POŽELJNIH USLOVA

**Napomena: Ocjenu vršiti upisivanjem ocjene iz člana 4. Odluke**

Poželjni uslovi	
Položen specijalistički ispit (sudijski ili advokatski ili notarski)	
Najviše priznanje i nagrada visokoškolske ustanove akreditovane u Bosni i Hercegovini	
Ostala priznanja i nagrade visokoškolske ustanove akreditovane u Bosni i Hercegovini	
Dugogodišnje iskustvo (član 4. stav 2. alineja 2. Odluke)	
Ukupni broj bodova	

## 2) OCJENA INTERVJUA

**Napomena: Ocjenu vršiti umetanjem simbola (X) u odgovarajuću kolonu**

Personalne karakteristike, iskazane sposobnosti, kompetencije	Ocjena				
	1	2	3	4	5
Fleksibilnost/prihvatanje drugačijeg mišljenja					
Motiviranost/entuzijizam					
Predznanje o poslu					
Relevantno radno iskustvo					
Analitičke sposobnosti					
Sposobnost iznalaženja rješenja					
Vještina komunikacija					
Potencijal za razvoj					
Ukupni broj bodova					

**UKUPNI BROJ BODOVA (1+2) \_\_\_\_\_**

### **Komentari:**

Ključne prednosti kandidata	Primijećene slabosti kandidata

Potpis člana komisije \_\_\_\_\_

## OBRAZLOŽENJE

### PRAVNI OSNOV

Pravni osnov za donošenje Odluke sadržan je u;

- članu 6. i članu 7. Zakona o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, br. 12/03, 34/03 i 65/13) kojima je propisano da se sva imenovanja vrše u skladu sa odredbama citiranog Zakona i uz propisane i utvrđene standarde i kriterije;
- članu 45. i članu 46. Zakona o pravobranilaštvu („Službene novine Kantona Sarajevo“, broj 33/08 – Novi prečišćeni tekst, 7/12 i 44/16) kojima je propisano da gradskog, odnosno općinskog pravobranioca i njegovog zamjenika imenuje, smjenjuje i razrješava Gradsko, odnosno Općinsko vijeće, na prijedlog gradonačelnika, odnosno općinskog načelnika, kao i uslovi za imenovanje na naprijed navedene pozicije;
- članu 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08 – prečišćeni tekst) kojim je propisano da Gradsko vijeće donosi odluke, druge propise i opće akte i daje njihovo tumačenje;
- članu 16. i člana 17. Odluke o osnivanju Pravobranilaštva Grada Sarajeva („Službene novine Kantona Sarajevo“, br. 20/10, 30/15, 12/17 i 41/21) kojima je propisana nadležnost organa za predlaganje i odlučivanje o imenovanju na ovu poziciju, kao i uslovi za imenovanje na predmetne pozicije.

### RAZLOZI ZA DONOŠENJE SA IZVJEŠTAJEM O JAVNOJ RASPRAVI

Zakonom o ministarskim, vladinim i drugim imenovanjima Federacije Bosne i Hercegovine, Zakonom o pravobranilaštvu, kao i drugim propisima, regulisana je oblast koja je predmetom ove odluke.

Obzirom da se u prethodnom periodu javila objektivna potreba za preciziranjem standarda i kriterija za imenovanje na poziciju pravobranioca i zamjenika pravobranioca Pravobranilaštva Grada Sarajeva, kako od strane pojedinih radnih tijela Gradskog vijeća Grada Sarajeva tako i od strane većine Gradskih vijećnika, to je gradonačelnica Grada Sarajeva, uvažavajući iznesene primjedbe, prijedloge i sugestije naprijed pomenutih organa i tijela, utvrdila Nacrt Odluke o standardima i kriterijima za imenovanje pravobranioca i zamjenika pravobranioca Pravobranilaštva Grada Sarajeva i sadržinom istog sublimirala izneseno uz poštivanje zakona i propisa koji regulišu oblast izbora i imenovanja na ove pozicije.

Zaključkom Gradskog vijeća Grada Sarajeva, broj: 01-GV-02-953/22 od 01.06.2022. godine, Nacrt Odluke upućen je u javnu raspravu u trajanju od 30 dana od dana usvajanja Nacrta Odluke.

U periodu trajanja javne rasprave nisu pristigle primjedbe, prijedlozi i sugestije na Nacrt Odluke te je u skladu sa navedenim utvrđen Prijedlog Odluke koji se dostavlja Gradskom vijeću na razmatranje i odlučivanje.

### FINANSIJSKA SREDSTVA

Za realizaciju Odluke nisu potrebna dodatna finansijska sredstva.